

四庫全書

集部

欽定四庫全書

集部

鴻慶居士集

總目  
卷二

詳校官右中允臣薩敏

主事臣呂雲棟覆勘

總校官降調編修臣倉聖脉

校對官學正臣翁樹棠

謄錄監生臣劉伸

鴻慶居士集序

大凡文人才士少之時屈首受書未能多閱天下之義  
理壯則從事四方志有所分及其老也血氣既衰聰明  
隨之雖有著述鮮克名家此古今之通患也其或軼羣  
邁往賦才獨異而復天假之年磨淬鍛鍊重之以江山  
之助名章雋語少而成壯而盈晚而愈精有若戶部尚  
書晉陵孫公蓋千萬人中時一遇焉公生于元豐辛酉  
當大觀政和間士唯王氏三經義字說是習而公博學

篤志如韓退之謂禮部所試可無學而能者第進士冠  
詞科筆勢翩翩高出流輩將及知命靖康倣擾為執法  
為詞臣旋由瑣闥歷吏戶長貳連守大邦其章疏制詔  
表奏往往如陸敬輿明辨駿發每一篇出世爭傳誦紹  
興而後遭值口語斥居象郡久之歸隱太湖上捨蠻蜚  
而狎鷗鷺去茅葦而友松菊于是繙北堂萬卷之鈔袖  
明光起草之手默觀物化吟詠性情烟波萬頃納之胸  
次風雲態變日接於前如是二紀所得不可勝計毋怪

乎筆端之衮衮也。天門劃開，訢章上達，論撰次對璽書。繼下年，雖耄老親為謝表，至於宰執侍從臺諫，則人致一啟，各出新意，其用意屬辭少壯所不逮。又後十載，當孝宗朝，嘗命編類蔡京王黼等事實，上之史官。此與伏生年九十餘，詔太常受尚書，何異？是豈可以他人老少常理論也哉？沒既一世，其子興國、太宗、介宗以書謂必大曰：「先君文稿中，更兵燼存者無幾，而閩蜀所刻復雜。」程忠惠之文，大懼不足傳信，今定為四十二卷，其未備。

者方哀次外集為我序之憶乾道丁亥遇公陽羨公八十有七矣論文之餘語及前朝舊事健論滔滔如洪河東注緒言纚纚如聚繭巢絲屢更僕不能休然後知公非特文鋒不可當而老如趙充國猶善為兵也茲幸挂名集端因且列之近歲吏部侍郎葛公立方作韻語陽秋載東坡自海南歸公方髫齡坡命對衡門稚子璠璣器公應聲云翰苑仙人錦繡腸坡嘆曰真璠璣也以公早慧固應有此然坡北歸實靖國辛巳公已二十一得

非元豐乙丑自便還常公纔五歲時乎所記訛耳鄉人  
既戶傳亦不得而畧也公諱覲字仲益嘗以龍圖閣學  
士提舉南京鴻慶宮故自號鴻慶居士云慶元五年十  
一月某日少傅觀文殿大學士致益國公周必大序





欽定四庫全書

集部四

鴻慶居士集總目

別集類三 宋

卷一

詩

卷二

詩

卷三

詩

卷四

詩

卷五

詩

卷六

詩

卷七

挽詞

卷八

表狀

卷九

表狀

卷十

書

卷十一

書

卷十二

書

卷十三

啟

卷十四

啟

卷十五

啟

卷十六

啟

卷十七

啟

卷十八

啟

卷十九

啟

卷二十

啟

卷二十一

記

卷二十二

記

卷二十三

記

卷二十四

外制

卷二十五

外制

卷二十六

外制

卷二十七

劄子

卷二十八

四六雜文

卷二十九

四六雜文

卷三十

序

卷三十一

序



卷三十二

書跋  
銘贊

卷三十三

墓誌銘

卷三十四

墓誌銘

卷三十五

墓誌銘

卷三十六

墓誌銘

卷三十七

墓誌銘

卷三十八

墓誌銘

卷三十九

墓誌銘

卷四十

墓誌銘

卷四十一

墓表

卷四十二

行狀傳

臣等謹案鴻慶居士集四十二卷宋孫覲撰  
覲字仲益晉陵人徽宗末蔡攸薦為侍御史

靖康初蔡氏勢敗乃率御史極劾之金人圍汴李綱罷御營使太學生伏闕請留覲復劾綱要君又言諸生將再伏闕朝廷以其言不實斥守和州既而綱去國復召覲為御史專附和議進至翰林學士汴都破後受金人女樂為欽宗草表上金主極意獻媚建炎初貶峽州再謫嶺外黃潛善汪伯彥復引之使掌誥命後又以賊罪斥提舉鴻慶宮故其文稱

鴻慶居士集孝宗時洪邁修國史謂靖康時  
人獨覲在請詔下覲使書所見聞靖康時事  
上之覲遂於所不快者如李綱等率加誣辭  
邁遽信之載於欽宗實錄其後朱子與人言  
及每以為恨謂小人不可使執筆故陳振孫  
書錄解題曰覲生于元豐辛酉卒于乾道己  
丑年八十九可謂耆宿矣而其生平出處則  
至不足道岳珂程史亦曰孫仲益鴻慶集大

半誌銘蓋諛墓之常不足詫獨武功大夫李  
公碑乃儼然一璫耳亟稱其高風絕識自以  
不獲見之為大恨言必稱公殊不為忤趙與  
皆賔退錄復摘其作莫沂墓誌極論屈體求  
金之是倡言復讐之非又摘其作韓忠武墓  
誌極詆岳飛作万俟卨墓誌極表其能殺岳  
飛一事力斥其顛倒悖謬則覲之怙惡不悛  
當時已人人鄙之矣然覲所為詩文頗工尤

長於四六與汪藻洪邁周必大聲價相埒必  
大為作集序稱其名章雋句晚而愈精亦所  
謂孔雀雖有毒不能掩文章也流傳菰苑已  
數百年今亦姑錄存之而具列其穢跡如右  
一以節取其辭華一以見立身一敗詬辱千  
秋清辭麗句轉有求其磨滅而不得者亦足  
為文士之炯戒焉乾隆四十六年五月恭校  
上

總纂官

臣

紀昀

臣

陸錫熊

臣

孫士毅

總纂官

總校

官

臣

陸

費

費

墀

總校

官



欽定四庫全書

鴻慶居士集卷一

宋 孫覲 撰

詩

泊德清龜溪亭遇大雨

崩雲四合千嶂重奔電一掣十里紅  
土囊叱吸萬竅風江翻石走昏相蒙  
疾雷破柱鞭老龍百賈顛沛市井空  
銀河倒傾千丈硤魚鼈欲取山為宮  
洪濤春天怒相攻

大舸吹簸如飛蓬醉卧掀舞一葉中洗我雲夢芥蒂胸  
忽然變滅何匆匆雷公收聲電改容霞舒霧卷縈長虹  
紺碧萬頃磨青銅溪邊結網南巷翁白髮黃馘射兩瞳  
赤鱗騰出無留蹤刻舟求劍何時逢

湖州天寧寺飲王生

莫闕蝸兩角且共路一邱夷踞坐我旁汝豈河南騶割  
肉一噉之徐以大白浮噲伍君勿譙笑談起封侯

二

諸家迹便埽得此一老兵江東醉司馬酒中尚求名哀  
哉南山其不平自號鳴慎勿歌烏烏作此老婢聲

宿太湖口

誰令醉尉怒端是丞相嗔交疎白眼見愁絕翠眉顰遲  
暮仍三尺黥驚窺四隣還將萬里眼笑索嶺梅春

二

白首對瀧吏辛汗愧逐臣溪山不改色風雨解留人坎  
壈知天意漂浮任此身紛紛小兒女何必淚沾巾

餘杭聞出師

國威連羣盜時危仗老臣分憂當北顧請幸且東巡  
肘足儀三晉創痍又一秦不眠聽野哭愁殺路傍人

富陽道中

渺渺行雲慢慢溶溶曳水衣雷翻巢墮乳風落網粘飛獨  
拄青藜杖來推白版扉平生邱壑趣漂泊寸心違

二

白帽炎州客青裙酒姥家微風搖扇浪細雨落簷花客

舍休占鵬蠻村欲饌蛇會令醒復醉高枕送生涯

桐廬連夕大雨溪漲數十丈徙寓白塔山上方閣  
蒼莽川流會渾酣海氣噓蛟龍改窟宅雷電走空虛殷  
地翻坤軸粘天浸日車高僧欲盃渡遊客且樓居壯觀  
真難值幽懷亦少舒翩翩一鳥去何必羨知魚

水退

蕩沃波瀾大憑陵意氣粗射潮鮫鰐怒鞭石鬼神驅雲  
斷千崖立風行萬壑趨檣烏朝共起水鳥夜仍呼灩灩

紅昇曉霏霏翠撲膚浮楂卧泥滓狼藉滿街衢

胥口

江濶卧人影山長送馬蹄渚蓮紅尚斂沙草翠相迷高  
樹藏雲直踈篁壓雨低酒醒渾不記端是武陵溪

釣臺

北塞風塵萬鼓聲東京社稷一戎衣綠林羣盜驅民去  
赤伏真人得帝歸諸老蟬聯蒼玉佩將軍坐鞚紫金鞵  
先生此日青霞志一笑凌空拄杖飛

二

故人遺像丹青落，蓋代榮名日月懸。  
萬馬羣空冀北野，一蛇獨遊原上田。  
晚浦輕蘋涵落日，秋崖老樹立蒼烟。  
高風自此騎星去，千歲光芒夜斗邊。

蘭溪津亭病起

離亂紛紛醉尉多，將軍獨夜灞亭過。  
旅巢對鵬占行役，客狙懸蛇卧宿疴。  
雙鬢盡從愁裏白，衰顏時向酒中酡。  
雲翻雨覆須臾耳，未用區區較唯阿。

二

風波湧地干漚發創痍鑽皮百箭攻藥裏關心防二豎  
謗書盈篋忤三蟲剖爪女隸方求巧結柳奴星也送窮  
笑我平生持螯手未應咄咄左書空

三衢聞都督兵潰常潤間懷舍弟而下

紫荊有信欲開花黃犬無情不到家偶坐厭聞烏噉噉  
孟行喜聽雀查查同看明月人千里相望孤雲海一涯  
驥子熊兒無患否風雲慘淡鬪龍蛇



月岩寺寺有岩石高數十丈一穴中空如半月狀

號半月岩

老墓蝕月缺破鏡擲道邊金樞環一夕玉斧斲千年何  
人挾寸鉄插羽飛上天但令蝸蝶死重看十分圓

立秋饒陽道中

殘夜山月吐蓐食治野裝策策林響變一葉風隕黃客  
路感時節起看鴈南翔秋風捩孤影雲路正茫茫老馬  
倦長道解鞍聊緩觴小雨濯鬢鬚欣然愜初涼

二

奇苞照屋角橘柚垂青黃感之勤中懷弓刀戒秋防竄  
身楚南極守隸工遮防投鞭得小偈乎席紛在旁虎賁  
起偶坐悠然見中郎一醉汨其泥江湖渺相忘

弋陽縣古葛陂也縣有古剎臨大溪相傳云佛圖  
澄浣腸故地

古道陰森翠柏行長鞭搖曳紫遊韁佩鳴蒼玉傾瑶席  
地布黃金列寶坊仙客杖飛龍有角胡僧腸浣水生光

兩朝人物空冥冥百代風流競淼茫松骨倚天增老氣  
溪毛着水渡微香鴉啼鵲噪秋風外千丈藤蘿掛夕陽  
過安仁縣權令主簿同蔡尉見訪

莽莽纏兵氣蓬茅庇一邱尚看蒙赤幟不復卧黃紬抱  
牘行鳬鶩徵租聚沐猴黃昏更蕭瑟風雨笑鵲鷗

二

投老一浮萍長亭復短亭誰憐仙客去自有故人經世  
亂眉多赤情高眼獨青臨分聽苦語令我醉時醒

宿臨川村舍

林壑已秋聲涼蟬又一鳴人間多古意地僻有微行身

老殊方去愁牽百慮生途人夜相語豺虎正縱橫

時建昌石

陂溢起

題臨川孝義寺壁

秋風嫋嫋轉庭梧客夢初驚一鳥呼揀盡寒枝棲不穩  
獨行殘夜影同孤

孤城吹角五更風笑語團團一夢中戰格連雲家萬里  
書憑黃犬若為通

疎山寺次白文林韻

翠幹軒軒迴出林夜風吹籟紫簫音老龍頭角雲霄近  
玄豹文章霧雨深末路浮榮炊劍首半生遺恨寄琴心  
愁吟獨濺花前淚故國山河百戰侵

白河東人有應  
為念交侵之語

二

藜杖匆匆集晚林長廊破壁撼鐘音天涯流落相逢地

盃酒殷勤莫厭深  
萬里功名飛燕領  
千金博飲炙牛心  
更聞好句驚人倒  
一洗蠻烟瘴霧侵

三

黃花翠竹小叢林  
卧聽南山白石音  
螳闕已空遺堊在  
蝸跬終戀故廬深  
掀髯一笑追前謬  
禮足同叅看此心  
且向踈山結香火  
人生莫受二毛侵

踈山長老善清日  
誦楞嚴維摩二經賦  
小詩二首  
示之

塵漲迷三鹿桑枯厭八蠶徵心渾不見問疾有誰諳坐  
待成風斲應湏立雪叅欽聞第一義細說後三三

二

彈指三生過傷心一念差試堞天上月為種火中花粗  
識禪為味初欣道有牙老師一笑許千劫誤蒸砂

明水寺五代末危全諷據臨川時所建畫像至今  
存焉寺旁最高峯有祠屋一區道士居之二首

臺殿何年有千岩紫翠間金仙佛世界羽客道家山骨

朽餘三窟皮存尚一班傷心千古淚相伴兩潺潺

二

愁坐猿啼裏行吟度鳥間翠凋巾上髮紅破鏡中顏老  
去經三折真遊付八還無心自來往空羨白雲閒

崇仁縣

萬山攢擁天一笠北風吹雨兩鬢濕饑鳥絕叫護巢飛  
老蛟怒起擎雲立孤城短日砧杵急騎驢渺渺衝泥入  
桑枝倒折機杼空道旁廢井無人汲遺民到今傳舊邑



擊水華鯨浪三汲故物漂流百戰餘客子起坐萬感集  
小驛香醪如雪汁一杯快作長虹吸酒醒寂歷照短檠  
幽咽數聲鄰婦泣

余南遷次臨川奏廬陵道屬聞盜掠高安新淦之

間少留仙遊山道祠是時巖下木犀花盛開漫  
山皆大松一峯蒼然終日遊惴其下各賦詩一篇

簷牙啄林抄筆殿浮青紅天風吹沆寥萬籟酣笙鏞木  
犀已著花濯濯秋雨中頽姿出素面一洗丹粉空幽香

襲中袂冷艷淒房櫳迫此芳歲殘一笑當誰共羣仙立  
通明矯矯驂鸞龍相隨歸閨苑遺恨寄西風

二

歷歷水中榆地遠連玉京掄材上華屋裊裊黃金莖蒼  
宮表獨立垂胡交縵纓根深崖嶠壯勢壓山岳傾萬牛  
挽不回老氣空崢嶸夜半風雨會歲晚龍蛇升我來不  
忍去繞樹三匝行珍重金石友待我烹茯苓

遣興

亂後煎百慮老去無一欣故人尺書至好語中夜聞坐  
久百蟲絕開簾月紛紛長歌又一醉酒醒擊空尊

題華蓋仙亭大松示柳道士

繫舟古巴江曳杖真仙亭金輿簇畫戟玉几羅翠屏堂  
堂十八公獨立霜中英魁然十圍大蔭此一蓋青翹翹  
雲物外坐閱秋蒂零道人依茅棟蕙帳淒芳馨苓龜倘  
可見長鑱斲青冥一食沉我腹敗履插修頌

仙遊山九日歎逝

傷心玉案兩眉齊永負黃花九日期萬里炎州嗟我老  
百年青唳向君垂俱飛蛺蝶愁看汝醉飽茱萸欲對誰  
獨立西風搖短髮一生遺恨一愁悲

二

割肉早歸三伏日傳柑賜飲上元燈那知一慟殊方去  
獨向臺高此日登淚濕西風坐眼纈夢回殘夜起關稜  
孤鸞別鵠知何處泉路茫茫喚不應

達臣議承餉石耳

窮秋客舍風雨淒破釜生魚鰾有衣故侯未種東陵瓜  
餓夫欲採西山薇歲晚黃金可療飢故園萬里天一涯  
未辨登山拾瑤草且復從公茹石芝

山行憇田舍老父出迎以黃柑白酒為餉

藜杖扶來雪滿簪諄諄好語意深深酒傾白墮杯行玉  
橘破黃苞坐釘金醉起莫辭田父肘甘餘須識野人心  
匆匆不盡扳留意挽袖丁寧更一臨

兩日復往次前韻

寒疎離離銀線亂

臨川出疎號銀條

凍醴灑灑玉井深坐蔭庭

松翹翠蓋行穿野菊布黃金犬迎客入喜見尾鵲隨人語欣會心俗裡淹留怕轅釜驅兒招喚得重臨

曹山寺

石棧梯空一線橫路窮臺殿兩參嶒日光淡淡烏飛沒雲氣茫茫龍隨行人西歸餘隻履結茅宴坐千岩底草根漑漑暗蟲鳴樹外騰騰青嶂起翠竹掩冉蒼雲屯老藤蔽虧白晝昏天低尺五雷雨上身强丈六祖佛尊

我老栖栖厭行旅逢人欲問前三語不見高僧錫杖飛  
山下空留千斛乳

贈曹山長老了如

一念挂世網平生語儒冠笑看蠅穴紙坐對鮎上竿  
費醺醬豈識天壤寬老儒本逢掖詩肩尚儒酸久纏  
冠蓋蔓忽作泡影觀堂堂人天師三世一指彈身閒雲  
月吐骨老霜松寒我生飽憂患將心覓人安目擊有妙  
寄語樂非世歡坐穩且復留火芋分懶殘

送僧妙鑑住廣壽寺

明月不可呼清夜時一出孤光掛海涯皎皎轉空碧道人一茅把坐睨九年壁磨磚破纏縛驟若老驥逸匆匆林下逢悵望不暖席錫杖已凌空塔庭草如積

明水達老以黃甘荔子土芋為餉小詩答謝

客居芥牢落幽絕無四隣歲窮有衣結日晏甌猶塵偏仄戎馬間敢厭薪水勤故人情義重采采青泥片小摘持寄遠分餘為情親丹荔劈輕圓黃甘破芳辛蹲鴟勸



加餐風味亦可人渺渺山澗曲浩浩水雲晨踞爐有前  
諾兩翁對然薪眼纈紅綠共此無邊春

次韻王子欽立春

玉手傳絲催歲金換刀剪綵伴春回兵戈滿眼年年在  
花鳥驚心日日来芳意漸還三徑草暗香猶認兩京梅  
呼童火急供春事凍醴先生灑玉醅

二

歲晚驚呼身已老天涯流落首空回便將酒力推愁去

且放春光入眼來人語嘻嘻爭鬪草宮花閃閃艷粧梅  
雪消水暖春江動綠漲蒲萄萬斛醅

東塔

翠竹含風嫋嫋青山照水重重窗戶無人半掩一龕香  
霧空濛

二

偶與白雲共出忽隨倦鳥俱還明日重尋舊路桃花流水  
水空山

遊東塔雨中夜歸

山氣濛鴻衣自濕意行曳杖穿雲入老翠陰森萬竹蟠  
浮蒼潏灩千峯立薜蘿幽尋到蕭寺拊掌一笑掀百蟄  
酒醒佛火照黃昏坐聽北牕風雨集

二

山色凌寒春尚瘦潭影涵空清可漱漠漠雲行紫翠間  
斑斑雨濕黃昏後火炬穿林鳥出巢人語聞門狗窺竇  
杖藜有興會重來更待黃鸝哢晴晝

次韻王子欽春望

王孫春望思寥寥冠帶常年盛八簫花靨重重牆外是  
琴心切切酒中招屠龍已破千金產駟馬重歸萬里橋  
便解貉裘沽一醉忍看紅藥糝寒條

二

萬木陰中鎖沈寥晨門跋馬聽蕭蕭故人自欲分茵去  
逐客何妨折簡招共對春風班露草却隨明月下溪橋  
擊鮮故有諸郎在三尺銀刀貫柳條

鄒次魏黃善長携文見招小詩為謝

鄒郎英妙知名久，筆端自有談天口。  
客舍相逢一樽酒，衆星錯落見箕斗。  
高論欲追牛馬走，長嘯忽作蛟龍吼。  
餘子碌碌那得友，江夏無雙亦其偶。  
我觀二妙屠龍手，青紫紛紛何足取。  
他年要作中興碑，大字磨崖繼聲叟。  
癸丑寒食曹山飯僧荐章淑人不勝悼往之懷書

于方丈屋壁

川逝日已遠，蓬漂久未歸。  
異鄉驚歲換，宿草變春暉。  
魂

夢差參是音容想像非遙憐小兒女慟哭紙錢飛

二

草草木皮棺松風生暮寒鶯啼春寂寂螢照夜漫漫夢裏號三匝愁邊薦一簞想思為君瘦零落帶圍寬

清明日與范季寔諸人過胥澤民別墅小集六言

二首

水滿雙飛白鷺花深百囀黃鸝寒食清明過了一川烟

草離離

二

兀兀三盃外困昏昏一枕春融酒醒落花風裏夢回啼  
鳥聲中

曹山春日

弱柳千絲颺河橫一帶圍腰支春作瘦鱗甲雨生肥逐  
伴魚兒出爭巢燕子飛匆匆班草地不覺卧斜暉

二

屏擁山入坐珠跳水濺裾香銷塵漠漠日淨竹踈踈身

逢百罹後春殘一夢餘故林千嶂外孤抱幾時舒

壁上人開軒闢地栽花種橘戲留小詩

看雲隨卧起飲水自敷腴秀色共齋鉢寒聲落坐隅未  
開花五色且種橘千奴幽事相關處時來近酒壺

春雨

小雨破春昏清風洗瘴氛霏微花上見蕭瑟夜深聞獨  
笑闌幽事酣歌倚半醺羈懷不堪寫危坐聽爐芬

春晚



花落不容惜，猶殘葉底春。稀紅閃餘映，亂綠鬪尖新。飛絮高度竹，遊絲遠趁人。窺簾聞好語，雙鵲喜津津。

二

殘尊斷送春，千里未歸身。鶯老猶聞語，梅酸欲聚顰。獨眠愁警夜，起舞聽雞晨。行路難如此，悠悠且傍人。

曹山

露宿風餐兩鬢華，故園蕪沒舊生涯。聖恩若許求帷蓋，便向東陵學種瓜。

二

竹杖芒鞋渾稱身  
草草香草醉中茵  
舉鞭叱馭何為者  
始信王陽是可人

三

毀瓦區區為食謀  
半生黍炊在刀頭  
一廬會入扶犁手  
不上陳登百尺樓

鴻慶居士集卷一

欽定四庫全書

鴻慶居士集卷二

宋 孫覲 撰

詩

有客生致兩雉不忍殺開籠縱之

平地安知禍有機一跌永負青雲期舉羣驚雉墮罝網  
袞背煥爛光陸離山梁一嗅不忍噉如臯一笑吁可悲  
開籠放汝須遠去莫遣韓公賦病鴟

二

誰令孤鷺遂專場  
剪送籠中看為翔  
文章正坐虎尾柄  
鍛羽一落千丈強  
翠翎低摧少顏色  
奇禍非汝能遮防  
匆匆應媒莫浪出  
尊拳毒手正相當

題妙覺寺壁

葉底紅稀不見花  
枝頭綠暗可藏鴉  
春歸古殿蒼苔滿  
一點籠燈隱絳紗

再至

老眼逢春病有花  
淋浪醉墨字如鴉  
懸知不是唐王播  
慚愧高僧護碧紗

宿妙覺竹菴贈靜老

青山映落日淡淡烟中明  
出門無所投曳杖隨意行  
破衲僧三兩喜笑爭邀迎  
曾巢俯修行飛星動高甕  
老人如宿昔真契同三生  
遇人無戚踈出語惡不情  
寥寥風馬牛肝胆欲盡傾  
怪我胸中山磈兀尚不平  
邯鄲樂無度短夢一餉榮  
蠻觸怒不休暴骨千里橫  
微言起我病

內愧面汗辭早知天宇大豈有世網嬰舉扇障西風浣  
此滄浪纓

胥澤民招飲

蕭塵散幽步不放一塵驚高崖初日吐壞道哀湍鳴平  
生耽田里見此心眼明危橋屬幽徑別戶延朱甕主人  
雞黍約庖烟起晨烹長鬚舉按出銀盃坐中行爛漫寫  
真意殷勤愧深情留歡更卜夜華燭吐長榮

蒼茫夜氣合渺渺風露清  
籃輿兀醉夢翩若孤雁征  
老馬志萬里絡首喪其生  
十年飽弱豆立仗不敢鳴  
自識酒中趣欣辭身後名  
皎皎一片心不受寵辱驚  
清風悲永夜萬竅同一聲  
醉裏有歸路彷彿遊化城

別如老

同舟無胡越四海皆弟兄  
吾人雖晚接一笑益已傾  
世亂識真態塗窮見真情  
曳杖扣禪扃撞鐘聽鞞鳴  
小窓風雨夜對此二榻橫  
吾身如木偶春至不復榮  
豈無三

宿戀天雨方流行去去得首邱歸田充殘更

徙寓妙覺佛舍胥人民襍被相過賦夜坐

客居厭窮獨蓬艾翳環堵莊舄尚越吟鍾儀猶楚語吾  
人有奇操空洞見城府相逢逆旅中霧豹初一睹拘囹  
賦囚山避謗憎市虎褰裳肯顧我崖嶠走風雨微吟對  
清夜破此五月暑墜露挹金莖空花墮犀塵孤燈映籠  
紗冷灑翳復吐耿耿遂不眠逢逢聽晨鼓

招鄒次魏



客舍風雨交庭蕪蔓春草萋食悲王孫戛釜厭邱嫂吾  
人才傑立一障狂瀾倒湯湯捍滔天凜凜塊絕島奇音  
開大朴妙語發天藻壁間見蝎喜屋上瞻烏好蛩然聽  
足音自然慰衰老出門泥活活所向碍行潦懷人心不  
展厭亂迹如埽仲子過我廬肩輿白雲道

贈答淵侍者

沐猴着冠天所械笑唾千金如一芥時時扣角諫三生  
口業未除詩有債薨薨不作秋蟲聲藹藹欲盡春雲態

平旦誰登大將壇一軍驚呼子光拜

建昌守朱直伯寄酒小詩為謝

愛酒淵明望白衣傳聞騎吏欺柴扉為憐漁父鳴鞭送  
欲使山翁倒載歸淚向琵琶絃上落心隨蝴蝶夢中飛  
一杯屬我寬愁病免使黎侯詠式微

再用前韻

千騎森森響鐵衣日上銅環四扇扉何妨指點銀瓶索  
直須倒着接離歸已邀明月三人共更看紅塵一騎飛

何日淵明賦歸去晨光前路正熹微

妙覺寺適軒

古寺秋崖上清風掩半闌  
晚花明艷艷曉溜落潺潺  
松筍穿階瘦苔窠蔽石班  
翹沙憐鷺靜抱葉看蜂還  
心以空無累身從病得閒  
儀曹獨何事終日賦囚山

二

老厭風沙惡安閒且當禪  
開簾延白月倚杖立蒼烟  
鳥散人聲裏鐘殘客夢邊  
小蒲風葉偃薄槿露華鮮  
句好

吟鬚斷歡餘醉帽偏人生但如此何處不翛然

好學書事

眊眊催沽我嚶嚶喚友聲一遭青蠅汗永負白鷗盟睡  
鴨噓烟滿蒼龍嘆雨鳴參禪我未暇一榻對僧橫

二

隱几拋書坐歌床聽雨眠僧來逢白足盜去失青氍楚  
國雖三戶滕氓尚一廛如今更何恨端用酒為年

次韻王子欽端午

飯筒菰黍趁流年  
葵扇桃笙尚宛然  
世味半隨昌獨苦  
心旌長與艾人懸  
鴻飛不到書來少  
鵲喜無憑語浪傳  
兩鬢蕭蕭吹白髮  
空餘衰謝老人憐

吳益先攜杖過見以詩為謝

千里之馬初服輶  
風駿霧鬣跨九州  
駕鹽挽磨三千秋  
俯首尚與駕駘遊  
吳郎人中第一流  
文采絢爛珊瑚鉤  
陽春白雪和者少  
夜光明月暗中投  
魯人不貴東家邱  
吾髯凜凜青兩眸  
縱金戛玉聲相求  
屬鏤雙螭九地幽

有夜氣出于斗斗忽然化作長橫虬睚眦之怨何作仇  
一麾立斷樓蘭頭

次韻王子欽

北牕風冷冷西閣夜悄悄缺月吐半壁獨與太白曉緹  
山王郎子粲如玉樹皎紛紛噲伍中特立負奇表清談  
靜炙燠堅卧鎮浮擾呼童高樹柵赤幘厭凡鳥

再和

二年客塵土獨夜憂悄悄遇酒一破顏歌呼醉連曉寸

心為誰明伴此孤月皎枯桺鬱崢嶸老榦空自表蟻穿  
萬孔萃蛛掛千絲擾白鶴逝不來豈敢更擇鳥

涂子野九歲子名駒字千里戲作

日角珠庭秀兩眉誰家有此寧馨兒莫驚墮地駒千里  
久見參天桂一枝

二

碌碌為生笑阿奴九齡重見此英雛千回健走非黃犢  
一洗羣空走白駒

贈竹庵靜老人

名爭計身後逐利了目前道人一彈指永斷三生緣起  
滅水上漚聚散風中烟紛紛閱凋謝東海今桑田縞髮  
茁枯顱秀眉覆兩顴已超人天上遂拍佛祖肩茅齋立  
萬竹蔭此碧玉椽綠暗雲擾擾清涵露娟娟我老無家  
舍餘地寄一廛不辭供井螳辛苦送華顛

置酒

離離黍禾暗空村一點炊烟帶雨昏山翁過我竹間寺



未扣爵羅廷尉門老去不辭闕詩酒區區獨醒一何有

笑語未辨供主人久客那能拒鄰叟杜陵白首尚書郎  
步屨春風向草堂人生意合無妍醜共此一夕燈燭光

讀李光遠詩卷次韻二首

泗州南山

跳波亂清淮一葉寄真賞南山如高人標落自矜爽胡  
塵暗初旬絕境墮渺漭空城草木春戶外履誰兩悵望  
壺公龍乘雲自來往小詩若圖畫髣髴見飛漿從今淮

上山不落夢中想

揚州谷林堂

楚山多異材翠竹滿崖谷蕭蕭斤斧餘斬伐同一束蕪  
城帶流水萬畝淇園綠遺苞駁雲錦老節抱金玉歲晚  
虎穴鄰舐掌方擇肉此君無恙否應坐白眼俗

志新誦近詩次韻

客舍秋風我欲愁世途如漆莽悠悠半生小利營錐末  
此日危炊上劍頭萬里窮鄉憐我老一廛小隱待君謀

惘然貌赤空相對扇面令人手不休

二

野鶴昂昂祇自奇  
水鳬泛泛強隨時  
問禪乞我安心法  
住世分君大藥資  
便欲乘桴從魯叟  
不須歌鳳歎周衰  
超然獨嘯千峯上  
一呖清風萬竅吹

石砦在宜黃縣之南二十五里義泉寺寺旁有磴  
道高里許循山而西少北忽有石梁數十丈橫  
絕兩崖之間中空無柱高出雲表神剜鬼刻不

可名狀真洞中心駭目之觀而僻在一隅遊客  
無所為而至乃賦詩一篇以告喜遊而不知者

何人手執造化闢投此虹蜺跨兩間烏鵲填成天上路  
鬼神鞭出海中山飄飄尻駕凌空舉側身下瞰千峯雨  
河漢洶洶聲西流風電相纏齊萬弩始信通天有一門  
便欲晞髮扶桑根乘槎忽逢支機石柱杖直到洗頭盆  
賞後誇雄兩奇絕邂逅一聲如電掣冥冥滄海會揚塵  
大字磨崖書歲月

題鄒次魏青藜臺

讀書非貴嗜吾子喜欲迷十年費膏火羣嘲笑書痴磊  
落載五車望海無津涯雙瞳如秋月一出照耀之冥搜  
理窟邃妙解鋸屑飛胸中九雲夢百怪見燬犀拊枕出  
鴻寶鑄金侔裊蹄神光發中夜太乙乘青藜

靜老容安庵

離離風中花深落任所之泛泛水中萍流轉復在茲靜  
公湖海士世網那得縻獨有鐵石心不與燥濕移巢肩

統靈鵲堵床餘老龜區區了官事應解笑兒痴

二

雲噓翠撲膚山擁青入戶祇樹給孤園桃源武陵路一  
從振履還不復垂盃渡倚牆捫蝨坐揮麈送鴻去水涵  
樓影交風斂花氣度把茅便有餘不要黃金布

靜老通幽軒

諸峯倚崔嵬衆壑隱奔峭寓目欣有擊會心領其要開  
廬結茅竹伐翳斬蓬蘼此君亦可人玉立盡娟妙風酣

翠相倚月吐清自照窮渺非世音鸞鵲中夜嘯烟塵暗  
北闕烽火被南徼便欲老三閭終焉隱屠釣

次韻王子欽秋懷

白汗翻漿浹背流清飈一掃破除休楓江湛湛冰壺月  
梧井團團玉露秋蟻動巧聞床下鬪駒跳首向隙中留  
南山危高稜見闕杞國區區豈我憂

二

愁邊種種關心事客裏紛紛見俗情雁折西風離思亂

鳥啼殘夜旅魂驚  
江河風景悲南渡  
家室倉皇問北征  
滄海橫流安稅駕  
一桴從我任平生

秋夜

山寒鵲暝姿楓老帶漲痕  
蘭折桂亦折往往歸其根  
萬籟各收聲一氣中自存  
鼻斤無可斲尻駕不復奔  
孤光照獨夜月落低金盆

二

金氣天與高燈燼宵征繁  
暗蛩露下積潛虬浪中翻  
幽



人醉清夜一笑空壘樽遇勝獨心許了了見目存但憂  
兒輩覺難與俗人言

三

寥寥大吠村微月耿黃昏雞豚市井空虎豹窟宅尊元  
龍百尺樓獨卧誰與論酒聖具復中愁魔自驚奔彈缺  
歸去來稚子候柴門

秋興

雲簇正南驚日車遂西沉倚樓孤客恨伏枕故園心唧

唧蟲造哀交交鳥遺音危坐百感集我何念之深

妙覺寺三詠

木犀

霜葩翳老青粲粲石壁下瓊樹一枝新肌冰敵姑射光  
風泛月彩芳氣襲蘭麝幽人三臭泣採玩不盈把芙蓉  
強爭妍刻畫粉黛假對之若為容慚紅面如頰

樹旁有芙蓉數

十本  
並開

梧桐

高梧傍層樓，隱翳崖寺古。森森露井寒，蔭此六月暑。秋風動地至，柯葉遽如許。依依別故林，黃落半粘土。涼蟬不復號，驚鵲時自語。一夜繞空枝，愁絕兩翅羽。

芙蓉

沙際漾淺碧，竹外嵌歌紅。晨光發濃麗，醉臉酣春融。歡華不滿眼，榮悴一日中。娟娟泣朝露，撼撼隕多風。

自崇仁趣新淦，凡四夕乃至一寓道觀三止僧舍，皆留一夕而去，賦小詩記之。

妓原寺

稚子應門立老僧迎客入湛湛玉秋寒唧唧銅餅泣小  
軒風雨過牕戶青紅濕晚花發秋妍黃蜂正衙集

化度寺

失路迷千嶂投林借一枝扣門竹西寺立馬日斜時雙  
鑠僧窺戶睂盱犬透籬定知嫌不速明日與君辭

栖霞觀觀在麻嶺下

雲表朝飛屐松殘晚駐鞍破扉聯白板槁項繫黃冠徑

雨喧風穽汀沙立露寒小牕床坐好對此百憂寬

三山寺

斜日半牕明無人獨掩扃風鈴時自語雪柏老終青立  
鵲參差見微泉斷續聽老僧渾不語危坐卷殘燈

二

異縣久為客窮途飽所更對床雲伴宿曳杖月同行到  
處身如寄看山眼暫明平生飲中趣酒賤且頻傾

江西  
多飲

紅酒獨新淦  
市酤稱冠

余大觀中與龔明登仕同為太學諸生別後二十  
六年余南遷道江清龔明逆于新淦之洲上蒼  
顏白髮大略相似感歎之餘飲酒賦詩以為笑  
樂龔明筆刀雄贍操紙立就凡六十七必用前  
韻余維和者十二篇云

亡弓隨甑一時空夢斷南柯午枕中便有樽壘追北海  
更無塵土汙西風騎牛懶卧山中相失馬來看塞上翁  
從此卜鄰成二老雞豚社酒與君同

二

龍媒去盡馬羣空一曲陽春在郢中  
浩浩百川齊赴海蓬蓬萬竅摠號風  
誰憐楚國沉湘客獨有商山避世翁  
閭里應容投綬急風波千里一舟同

再和

烏啼鵲散晚庭空並合相呼入酒中  
逐影故慚夸父日披襟聊快楚王風  
牛衣泣卧悲遊子鳩杖歡迎愧老翁  
笑我獨醒成底事一邱之貉古今同

二

沙平雪漫水涵空路入千岩紫翠中  
村遠微明漁舍火樓高斜矗酒旗風  
可憐方外狂司馬來伴田中一秃翁  
南北相望三十載心期不改斷金同

再和

瘴雨蠻烟埽地空衆星環列拱天中  
豹章尚隱南山霧鵬背將搏北海風  
麟閣似聞登漢將鹿門猶自卧龐翁  
低頭莫負平生志冠蓋風雲萬里同



二

夜鶴悲鳴蕙帳空一身竟在百憂中驚魂尚喘吳牛月  
短翮甘隨宋鵝風且與龜魚為地主不將鵝鴨惱隣翁  
超然世態誰君似蘭菊春秋自不同

何倅利見許出侍兒襲明用前韻賦詩再和

平生慣見有司空腸斷蘇州一盼中此夜相忘千里月  
他年應恨五更風坐中不樂無三粲

侍兒以英  
粲為名

客里相

逢祇兩翁急雨催詩更蕭瑟小牕寒夜一燈同

二

錦堂蓮燭夜燒空  
喜笑蟬聯綉戶中  
塵繞梁飛歌白雪  
襪凌波去舞回風  
投梭且莫驚狂客  
却扇何妨眩醉翁  
青鳥殷勤問消息  
留髭滅燭許誰同

何嘉會寺丞遣嫁侍兒襲明有詩次韻

魯陽之戈倚半空  
誰能一却日再中  
驚回十二巫山雨  
永隔三千弱水風  
瘦語便傳黃絹婦  
多情好在紫髯翁  
謫仙尚有盃中月  
獨舞婆娑醉影同

二

哀彈已逐楚雲空  
錦字參差在眼中  
應是桃花貪結子  
任教柳絮舞隨風  
留春不住無樊子  
隔水遙看有杜翁  
無那丁寧花鳥使  
丁香偷結兩心同

迎薰堂小集襲明用前韻再和

飲痛瓊艘百柁空  
參橫斗掛月當中  
不愁馬上衣沾露  
且看樽前幘墮風  
未辨清歌娛醉客  
莫將強韻壓衰翁  
詩成快寫鮫人淚  
萬顆驪珠訝許同

何嘉會以侍兒歸彭生小詩戲之

浮蒼宛宛兩眉長  
瀉碧泓泓一鑑光  
山海相逢非浪語  
小孤明日嫁彭郎

長樂寺

層梯倚天碧  
細路連草莽  
蕭蕭青松門  
稅此盃中鞅  
輪囷老樹枝  
偃蹇怪石狀  
中有蓮花臺  
迥出諸天上  
空堂卧鐘鼓  
古佛暗龍像  
飛泉漱石除  
夜半發清響  
雲低雪浮浮  
柳動春盎盎  
超搖萬里眼  
更欲登疊嶂

二

萬瓦冠松壁千嶂鎖雲莊故人置酒地清夜燈燭張破  
壁掛月闕遺簫嘯風廊妖歌傾四座醉卧錦瑟傍寂寂  
花絮亂匆匆鶯燕忙雍門已陳迹餘音空繞梁我來久  
徘徊驚呼首一昂老僧獨依然對坐柏子香

何嘉會餞  
愛姬于此

呼字當  
作去聲

志新遣介致書餽以巴蜀紙黃柑珠欖大栗鵝鮓胎  
蝦為餉戲作長句為謝

巴江新擣萬穀皮，褚生粉面膚凝脂。故人千里特寄我，落筆宛宛天投霓。綈囊丹果十襲包，爆栗飛燼石火敲。紅顏著樹落青子，香霧暎手披黃苞。蒼鷺無罪見蘆鹽，苦酒濯之光五采。蝦蟇久已成枯腊，咫尺波濤渺江海。客舍紛席爭滿前，饋羹不復五漿先。殷勤重餉有吾子，兩夫擔荷賴其肩。

嘉會飲餞愛姬大慟而別

小牕危坐若為情，曳杖穿雲取次行。蕭寺試來攜手處，

陽關已作斷腸聲歌呼本自追曹相慟哭那知見賈生  
坐上誰人最愁絕江州司馬淚縱橫

遊鐘石寺問名寺之因老僧指門旁石如覆鐘狀  
賦詩一首邀何藁明登仕同賦

月斧琢腫朧團團覆石鐘連絡青雲根點注碧眼封補  
天記女媧移山宅愚公當年偶遺漏墮此草棘中奇礪  
久淪蟄化出金仙宮老僧慣見之笑視瓦礫同礪角戲  
烏犍送火敲青童摩挲問無恙千歲今一逢堂堂張茂

先扣我蜀井桐，噌吰振林莽。叱吸萬竅風，瀕洞衆壑滿。  
吼徹九地通，狂奔竄幽窟。題驚怒拔老龍豐，山霜霰零彭。  
蠡波浪春一鳴，固有待寸筵。那得攻水曹，筆五色東序。  
羅笙鏞辟易，四坐傾踏蹴。萬馬空偉茲，抱奇音伴我窺。  
靈踪賦詩乃不如，露草號秋蟲。


宜黃尉李集義遣書問安否小詩為謝

三年着南冠，兩見芳歲新。朝為蟲蛇侶，暮與魍魎鄰。行  
隨木上坐，卧對竹夫人。獨有金石交，不廢風雨晨。書來



一弔屈我已屢厄陳嘖嘖爨下桐嗷嗷轍中燐紐以朱  
絲繩放之碧海津窮途得重惠肝胆大輪困嶺雲亂壁  
絮簷雨收斷線箕神擁前驅萬瓦集微霰土峯忽崔嵬  
炯若簪出弁衣稜森欲起眼結醉復眩屬國卧餐毡含  
糊不能嚙

喧厖湊六合瀕洞咽羣籟俄驚江海懸坐覺虛空隘包  
藏失地險瀰漫見天大嬋娟自一種巧麗窮百態獨餘  
古柏青正色老不壞



鴻慶居士集卷二

欽定四庫全書

集部

鴻慶居士集卷三

四

詳校官石中允臣薩敏

主事臣呂雲棟覆勘

總校官降調編修臣倉聖脉

校對官學正臣翁樹棠

謄錄監生臣劉伸

欽定四庫全書

鴻慶居士集卷三

宋 孫覲 撰

詩

次韻王子欽上元感事

寒雨吹黃屋明星照紫宸  
龍沙萬里去燈市七年春  
感戀丹心折悲吟白髮新  
孤臣卧江海老淚滿衣襟

二

金地三千界珠宮十二樓人行仙佛土春滿帝王州邂逅羣雄擾消磨百戰休傷心歌舞地錦纜起汀鷗

事見杜子

美秋  
興詩

三

冰雪依春盡雲山發興多微吟愁獨夜小立佇斜河社鼓村村急樵音處處歌呼童婦月榭不飲奈明何

題硤江蕭氏庵

雪屋清如洗雲崖翠作堆破扉風自掩敗壁雨先顏野

色初還柳林香尚有梅滄江千萬頃一鳥鏡中回

二

雲逐歸心亂山隨望眼賒疎林歌晚照淺溜咽春沙客  
路三千過僧窓一笑花此生安稅駕有地即為家

思賢堂蕭君築室江上館李先之先之既沒李伯  
為記其堂曰思賢云

篇榜銀鈎動褒題衮相尊天邊玉女去江上草堂存蠅  
附俄千里龍登有一門蕭郎傳舊業擊水看溟鯤

二

相國開藩日樞庭放鷁時  
碧油來弭節彩筆坐題詩  
有客皆如此知君更不疑  
相逢一笑喜空恨十年遲

堂中有李

伯紀徐師  
川詩榜

宿善法寺

野寺知名久歸鞍試一尋  
亂山迎晚眺萬木拱春臨  
遙想超神界安禪見佛心  
時叅鼻端白趺坐息深深

二

雪漲春江動雲歸暮塢深岩棲塵不到禪几老難侵野  
虎風生嘯哀猿月伴吟荒雞號五點說盡落凡心

再賦

水繞禪窻淨香凝古殿深讀書不求解酌古聊自斟塔  
鈴已無語匣琴猶有心獨誼西閣夜風滿快哉襟

二

愛竹門可款命車壑初尋鳥啼春院靜人語夜堂深鼠  
跡留金鉢蝸涎浣佛金隣翁笑相命春酌夜沉沉

田雲  
嵌從



政置  
酒

天長寺

江行蕭家峽路入天長寺沉沉千步廊植杖聊一榻山  
對逐客愁花濺寒食淚提壺苦勸人何物關汝事

次韻王子欽雨中

夢斷行山去詩成急雨催霏霏壑谷滿閃閃映空來出  
岫非無意為霖信有材故園小桃李昨夜一時開

襲明登仕出示尊公家傳留讀數過撫卷太息賦

小詩歸之

鼻祖有殊相

事見家傳

耳孫信多賢閱世已黃壤傳家尚青

羶妙語今作者生氣有凜然便須勒蒼珉揭此宰樹邊

再過天長寺

巖姿天露巧地勝延隙光鯨怒四海關蝸蛭一身藏逃  
空真樂見甜寂幽夢長燈暗不復續卧看月侵床

二

山立起平案松偃卧枕光尚憐桃屬小已見麥頭黃檢

事關兵氣逃禪入醉鄉平生湖海興一棹付慈航

利見置酒燕超軒襲明賦詩次韻

杯行到手莫留殘忍聽金鐘吼夜闌紅雨亂飄花帽動  
碧雲吹斷玉笙寒破除孤悶千疴散邂逅良圖一笑懽  
老去更勤秉燭對花渾似霧中看

二

芋大鶻衣對懶殘銅瓶泣雨又更闌臨風洗耳真堪笑  
映雪看書且耐寒共指分襟能幾日直須把酒罄交懽

風流喜見佳公子未信窮途白眼看

分宜道中

老牯挽犁泥沒膝剡剡青挾鉞水出大麥登場小麥黃  
桑柘葉大蠶滿筐猿鳥初呼聚儔侶繅絲百箔聞好語  
此時物色不可孤勸君沽酒提葫蘆

宿袁州城外祥符觀越日徙糾廨舍

宜春客舍無一夕古觀獨眠不能席破屋飈飈人雨立  
空林嘖嘖蛩夜績青袍白馬郡督郵晨門過我鳴前駟

不求五斗彭澤米且卧百尺陳登樓

萍鄉縣

雲夢青邱蟠楚藪萍實江邊大如斗故壘推顏百戰餘  
舊事傳流千載後青崖半裂蒼兕吼空陂哭過黃狐走  
山深日落少人行寂寞鳴蜩嘒高柳江湖一夢三年久  
慰我飄零一杯酒羣盜須降漢赤眉故侯辦作秦黔首  
安仁縣有大第一區官兵縱暴主人谷氏避不敢  
居三年矣縣尹常館過客于第中賦主人避地

行

主人避地卧荒村道傍故宅今仍存烏鳥呼風白日靜  
藤蘿掛月蒼烟昏壁上削鐵千步垣客子不敢窺其門  
一時勝事那能說撞鐘擊鼓行金尊

二

華榱翠桷刻蛟螭蒿艾不剪與戶齊野鼠羣行畫躡壁  
山鬼一脚夜撼扉緹騎埽迹今已非官兵縱暴來無時  
千炷耿耿四壁立主人避地何時歸

衡州靈泉寺觀競渡

噴雪怒相搏投虹貫其中張頤嚇北客拍手笑南公固  
自輕一死終然鬪兩雄躊躇倚山閣得失漫雞蟲

二

健捷兩首虺爬沙百足螭擊水羣鯨動起風一鳥翩壯  
心殊未已怒臂欲無前亦有旁觀者躊躇奮兩肩

即事

落日投林去低雲貼水飛江翻半嶂倒帆健一風肥醉

重傾蠻榼歌清繞妓衣城南多勝事何必閨中稀

回雁峯

三年踐蛇虺一命抵豺虎悠悠故園心萬里崖嶠阻祝  
融方司南巨岳鎮全楚滄浪瀆石壁白日灑飛雨寥寥  
蒼梧帝髯斷泣二女瀾斑竹上淚濺血今如許沉文弔  
湘纍魚葬得屍所寂寞千載魂故物但角黍吾生將安  
歸墮此瘴江浦逐臣正南遊倦鳥已北翥放身秋崖上  
萬壑赴一關干戈浩茫茫安得翅羽



愚溪

羣休眩鹿馬獨覺辨澠淄蟲鳥豈知道斷尾畏為犧草  
木詎有靈衛足不如葵智囊糲里子痴絕顧愷之成壞  
繫所遭何必陋昨非儀曹天子士失身蹈危機一斥卧  
江海南冠繫湘纍不起蛇陸便作馬

闕

棲匿智以為

愚更欲以名溪溪山清可厲溪上碧相圍石底行翠蚪  
烟中採修眉一朝續息定白日斷履綦叢祠翳篁竹秋  
風生網絲凜凜望千載避世真吾師故物不可尋山川

尚華茲永懷西州動興言北山移欣然解其會了了不  
復疑獨醒亦何事誓將餽糟醕舉酒酹一觴宛宛度雨  
期蕉黃配丹荔歌此迎神詩

北山謂愚公也

礧岩

去全州十五里

日上千峯亂風岩萬壑秋兩岩折天鑄一水漲岩幽絕  
岼飛橋過尋源秉燭遊倚空翹翠葆漱石走蒼虬

岩中乳益

皆碧也

老樹挽天立奔雲接地流壯懷開浩蕩病骨聳飈

颺皓首殊方去清樽盡日留無人與說似勝侶滿南州

礪岩寺

千峯夾道直一水抱村流清絕小叢林繞舍竹修修老  
僧慣見客壞衲雪滿頭野菓折奇苞畦蔬剪新柔漂零  
五管去邂逅一笑留詩成寫君壁紀此夢中遊

靈泉寺

窻戶邊開紫翠間小橋獨立曉潺潺意詩獨有清風共  
興盡聊隨落照還但見虛童蒙白恰且無瀧吏發驂顏  
風花雨葉元無定何必區區戀故山

嶺外虛市市人大半以白恰蒙首

次桂州

過嶺逢人問象州瘴烟如海蹴天浮  
三閭逐客何將到  
八桂宜人且少留

二

江上烟雲翠作堆倚天青壁鴈飛回  
神州一望三千里  
不是南遷肯獨來

桂林山水奇麗妙絕天下柳子厚記訾家洲亭粗  
見其略余以六月六日度桂林嶺欲更僕詣象

屬暑甚遂少留日從諸公于岩穴之下窮林巨壑近接關閭之中遠不過閩之趾舉高望遠夸雄關麗殆不可狀擇其尤者以十詩記之名之

曰桂林十詠

八桂堂

橘中隱商顏桑下蔭羽葆古人日已遠貴跡今未埽英  
英八桂堂屹立表衆草名隨五柳傳壽待三松倒南堂  
駐金節伏劍收蠻獠駢立萬馬獵獵卷千幃元戎領

客來小摘羞澗藻醉纈亂繁花移來插晴昊

七星岩

十載汗修門簪橐侍帝垣五雲深莫窺衆星拱以繁一  
坐牘背書身落海上村山川發餘想鐘鼓眩昔聞星圖  
煥斗極兩兩錯地文今日復何日乘槎造天閣日月起  
可挾參井立能捫誰當揭其柄為我酌瀛樽

棲霞洞

飛仙巢三山弱水環四溟誰知黃茅嶺自有白玉京獨

曳一枝筇枝空上青冥蟾飛墮八桂石隕化七星幽幽  
炬火然異狀不可名垂天紫雲蓋插地翠羽屏已無俗  
士駕上有遷客經敢言居夷陋妙紗冠平生

來風亭風洞在七星岩之下魯公岩之右大暑  
將有風出穴中泠然如冰雪被體不可久留  
舊有亭摧壞始撤而新之趙漕少隱置酒落  
其成名曰來風云

萬樹張大傘千峰卧獨龍彤雲竟天

闕

投

老落蠻僑喝死愁吳儂風流貴公

闕

蒼崖折天鏹中有萬里風習習駕兩腋飄飄落瓊宮草  
木嘯竽籟澗谷酣笙鏞披我快哉襟誰能辨雌雄

龍隱岩

跳波觸石喧古木抱崖擁老蛟壓泥蟠一笑作潭洞孤  
峯起嶢嶢哀壑浩呼洶腥風噤蛙淫凍雨落毛氄凜凜  
白晝寒瘴髮立盡聳旱氣曛日黃縮爪但陰拱悠然四

大海歛此一毛孔安得化為霖蕙葉有光寵

時禱雨  
未應



曾公岩曾子宣丞相元豐中守桂林遊七星山  
始見此洞茭薙草莽中平坦方廣可容數百  
人悉布磚甃之入洞十餘步有澗水橫其前  
不可涉公梁石為橋以便遊者號曾公岩

羣峯依天立萬馬屹不動風歌紫玉珂雨暗青絲鞵相  
君千里目渺渺孤鴻送披雲覩天巧鑿翠出岩洞中空  
貫長虹側立剖大甕宛宛卧石梁欲起闕地控玉棺已  
上天甘常有餘誦獨餘澗底泉時與幽人共

雉山岩昔有僧結菴此山中誦法華經野雉日  
一集聽之至終卷乃去率以為常忽數日不  
至山下有婦人產子腰脇間餘雉毛數寸寺  
有石紀其事

頑石解首肯老松聞肘回野鳥集隅坐聽法時一來山  
僧古佛徒一龕寄岩隈哀此墮卵狀點礫妙奪胎休去  
復歇去呱呱見啼孩獨此腹脇餘斑斑尚毳毼精通日  
月貫義動金石開異事垂千年仆碑卧蒼苔

永寧寺佛閣五代末馬氏據有荆廣時其子實  
所營也閱二百年壯麗如故有畫像存焉狀  
貌魁梧稱其閣云

一念去來想萬象起滅境方寸有所營可與天地永五  
季日尋戈四海環沸鼎炎方一旅平烽冷夜徹警梯空出  
高峯飛閣冠五嶺照耀人天上變滅彈指頃故物二百  
年虎死尚炳炳小立梯層欄烏鳥聚落景

西山超然亭

厖區翳榛莽地瘴藏百怪西山何軒軒拔脚風塵外中  
縈一線蟠側立兩壁對旁連九疑高遠控三湘大孤亭  
坐林杪俯見飛鳥背號方泣二女禦魑竄四罪誰去寃  
囚拘故自脫天械飄飄思淩雲萬里風雨會

虞氏隱居雷守虞沈避地桂林結茅江上萬山  
環立二水交流遊客過其下皆有志歸與卜  
隣之意

山色洗眼青遙見紫翠重江光照肌白醺作冰雪容問

金五十四卷二  
卷三  
誰三間茅散我九節筇江聲過席上山影落盃中主人  
樂忘歸卧聽鼓角雄檢點屐齒痕爛斑尚苔封寂寂春  
羅月蕭蕭秋桂風何日賦歸來庭柯撫孤松

翠屏洞

團圞千嶂抱窈窕一屏開翠黛愁將斂烏雲睡作堆倚  
松真漫爾藉草亦悠哉更有陽臺雨朝朝暮暮來

二

千仞鬱嵯峨纖纖翠錯磨霧環夢碧玉風慢卷青羅鵲

喜窺人語鶯嬌倚樹歌江花紅濕處彷彿襪凌波

飲修仁茶

烟雲吐長崖風雨暗古縣竹輿頽兩肩弛擔息微倦茗  
飲初一嘗老父有芹獻幽姿絕媚嫵着齒得瞑眩昏昏  
嗜睡翁喚起風灑面亦有不平心盡從毛孔散

事見廬  
全茶歌

九日次獻花鋪

李衛公貶海外道過  
象江蠻女獻花於此

古路三叉口青裙兩髻丫更無陶令菊空想衛公花破  
屋堆黃葉清江綠白沙殷勤邀一醉蚤酒壓梨楂

入象州界

須賈之罪髮可數張儀之辨舌空存以身藏怨今如此  
不死投荒感上恩殊俗若為投緩急故交何處問寒溫  
多情烏鵲真幽伴莫遣張羅翟尉門

到象州寓行衙太守陳容德攜酒見過

萬里南來亦偶然一盃相屬豈非天直從尺五城南社  
行盡南陽路八千三夜故人應入夢五漿客舍有誰先  
使君遥駐花間馬欲伴愁人到酒邊

二

飮坐黃甘喫手香堆盤丹荔照人光莫辭蠶酒一樽赤  
會壓瘴茅千里黃未省讒言遭薏苡直將空腹傲枳櫚  
酒醒夢覺知何處樹影參差月滿廊

南山寺

千丈雲根蔭此邦沉沉寒影卧秋江潭空映日蒼虬動  
烟煖翹沙白鷺雙夢覺灘聲喧客枕吟餘竹色滿僧牕  
詩成絕叫曾樓上聽我洪鐘萬石撞



二

安心是藥本非禪遇勝欣隨意所便嚼蕊拈花身老矣  
穿雲涉水思茫然行逢酒伴操觚去倦憩僧牕借榻眠  
寄語排言問津者人中今是地行仙

象州行衙井泉甘冷太守而下皆飲此井

雞號更五點衆星尚煌煌殘燭半吞吐宿酒疑在亡碧  
井陰修梧林疎月汪汪嶠南瘴癘地飲此冰玉光晨瓶  
出雪乳一漱病齒涼衆汲欲盡及匏尊得細嘗

題象守坐嘯堂

治國如烹鮮馭民如牧羊薰狐蘆自焚投鼠器必傷曹  
侯百世師獄市寄全齊天下本無事庸人勿擾之危機  
蹈潛弩惡吏冠虡虎飛走豈不高搖尾墮網罟使君古  
太邱妙割無全牛班春千騎曉長嘯萬壑秋棠陰日轉  
午風簷翠交武問道舍蓋公誦詩選何舞渭水占熊羆  
萬里咎羌夷試磨南山石更草中興碑

郡有南山石壁  
數百丈屹立江

水中如  
渚臺

別象州陳守容德

三年客殊方榮悴不堪說迢迢家萬里奄奄命一髮使  
君古丈夫興哀在縲紲平生風馬牛舊職比鷄鵲欣然  
一笑粲彼此百憂結皇恩下天扉淚泣孤臣血行厨洗  
玉盤載酒助歡悅庖珍問五鯖餅字炊十裂徙笑今未  
黔班草永一訣何須更秉燭端是夢中別

雉山寺青羅閣

蠻村避謗三年過野寺尋僧半日閒小檻吹香花漠漠

斷崖漱碧水潺潺枕柳葉底秋聲滿  
柏子烟中午夢還  
便擬買舟隨釣叟一蓑烟雨繫滄灣

蒙亭

小築三間足雄包萬象并遙波通極浦  
落日抱孤城小  
語千巖應長歌百壑驚坐看衣屨上  
漠漠晚雲生

二

落拓詩酒伴踈慵粥飯僧盪胸開遠  
抱拄頰見高稜鳥  
倦猶聞語蛟寒正可罾一區如可卜  
吾不愧陳登

七星觀

邱壑心猶在筋骸老可憎倚筇欣小榻躡履看先登神  
馬何須駕尻輿本自興九關通一路欲躡嶺雲升

發桂林劉帥立道同諸司出餞于甘棠渡口

行盡海北天笑指湘南路使君載酒醪擁節東城駐前  
驅千纛直縱獵萬人呼塵流翳白日十里映黃霧何人  
揖迎我一葦橫江渡渺渺倦鴉翻相從歸薄暮

二

洶洶萬號颶風吹海渾冥冥蔽一天瘴雲埋日昏南  
荒底日所黃葦三家村誰云花解笑但有鳥能言繆恩  
解南冠歸路首北轅酒行可以起稚子候柴門

北歸過永永守趙君宰置酒萬石亭

三湘陌上逐臣歸萬石亭中送客時拄杖披榛行莽蒼  
汲泉磨蘚看魁竒天傾五色遺媧補谷變千年出峴碑  
何似溪邊小桃李向人膏面出風姿

皇妃嶺

濯濯漱壑泉，岩岩依天石。扶藜上秋空，一縷挂絕壁。胡  
為乘此險，登臨風雨夕。千金戒垂堂，尊馭且莫叱。

過衡州館于郡齋時太守裴夢貺督役于城上

萬鍾風雨集，三令霜雪嚴。適發半閭左，雅春亦髡鉗。大  
事難慮始，掇龜寧復占。君看執扑者，端是邑中黔。

宜春臺呈太守陳次明

聞說宜春好，層臺試一登。隴泉悲瑟瑟，松雪見層層。孤  
絕烟中寺，微茫樹下僧。詩工傳寫妙，不數畫師能。

西齋

二江戎馬後宜春獨稱雄重垣抱金柅巨塹疏玉虹使  
君師齊相佳處在酒中百觚倒春釀洗盡瘡痍空西齋  
置一榻時有客子從我來屬無事新脫楚市春伴值呼  
浩然驚座得孟公歌眠看衙集鼙鼓鳴逢逢

再過曹山示如老

不羨鵬南運聊隨雁北還捫天上何嶺犯雪過曹山偶  
到萬里去重來一夢間觀河見如舊雙鬢自爛斑



故侍御鄒公抱節亭

一邱黃壤卧龍泉  
光氣輪囷夜斗邊  
長史青毡無舊物  
拾遺華屋有修椽  
鳳麟毛骨皆如此  
水石風流尚宛然  
亭下不生閒草木  
籜龍無數皆參天

鄒志新追路至角橋有買田之約三衢道中作詩寄之

首路冰雪巖過家  
梅柳動故人一笑隔千里  
勞遠夢夫君具眼隻閱世  
妙百中嗜好如酸醎  
不與俗人共我老

卧瘴氛推撓讒夫衆敗履誰見收乘槎子宜從歸袖風  
中翻翻若孤雲縱殷勤三日別折柳天下送那知漢網  
踈欲問周鼎重江臯兩牛鳴塞壘萬絃控終當受一厘  
竟欲鄰二仲請師樊遲圖共抱漢陰甕

鴻慶居士集卷三

欽定四庫全書

鴻慶居士集卷四

宋孫覲撰

詩

送王循道赴省試

龍擾已可屠，瓠堅今可攻。不辭千金費，莫計五石容。藏器古有待，用大難為工。平生不龜手，佇此一戰封。

二

千金市駿骨想像不可逢安知轅軛下硯礪卧肉駿天  
廐四十萬一洗凡馬空葉公莫驚走始信有真龍

三

秦俗自擊缶齊人善吹竽寧聞牛角鬪莫奏鳳將雛獨  
唱誰能曉彌高和欲無中郎非俚耳為斲爨中枯

四

殖綽拜勇爵儒冠堪溺中可憐毛錐子詭詭尚爭雄夫  
君口擊賊陳言賤雕蟲行以立談間可折萬里衝

過臻闍黎

龜肌鶴瘦老臞仙  
壞衲穿孔雪滿顛  
無數岩花開自落  
青山相對獨依然

二

髯龍遠舍立踈踈  
白甲蒼皮十抱餘  
當日青青折釵股  
如今老節已專車

三

莫便將心到處安  
小牕趺坐兩蒲團  
芋魁半熟通紅火

鼻涕垂頤對懶殘

送智海上人

大師興趣在江湖拄杖扶行穩當車苦要詩翁談生活  
穿雲涉水到西徐

二

折鼎支磚石半歌拾薪乞米為朝飢昏昏一點炊烟裏  
見我邯鄲夢覺時

馬跡上塚遇大風雨書僧壁

松竹騷騷繞舍鳴沙頭一夜連雨明衝泥裹飯澆新塚  
野哭干霄共一聲

二

白恰排肩上塚歸飢烏攫肉紙錢飛東家已改清明節  
一點炊烟上翠微

示相者

漢嬖寧聞通餓死秦黔自說布當刑侯王將相元無種  
試向人奴覓衛青



某靖國中與時發同寓郡庠潛心之北牕凡三年  
而別別後三十五年復相遇於荆溪頤山之下  
蒼顏白髮互相驚歎追數一時同舍生在鬼錄  
者十八九獨兩翁無恙耳方築室山中以老焉  
將與時發杖屨往來如杜子美所謂兩老者過  
賦詩而以為之先

簪盍盡晨夜裾連講肆朝昂霄初一睹歷塊已先超竟  
卧鹽輜老終遺爨鼎焦月分千里共波折兩萍漂卷地

邊塵合彌天劫火燒途窮歌兕虎巢燬賦鷓鴣稚子開  
三徑先生守一瓢但空囊似腹莫折磬如腰憤墮樵風  
過袍斑釣雪饒蝸盤憐角縮鼠點看鬚搖鳬鴈吾何算  
松筠子後凋共憐身獨在相視意俱消負釁投炎海全  
生託聖朝那知龜是鼈已見鵬如鴉楚玉號三獻堯雲  
煥九霄啼烏占夜喜歸馬弄風驕便殺雞為黍休尋鹿  
覆蕉並隣如可卜半道不須邀汲井澆桑本攜鉏蒔藥  
苗千端身外事一噓醉中鶯蟻泛蓮垂葉魚烹柳貫條

往來成二老隨分各逍遙

次韻王次之龍圖

撥雪披雲粥面濃三盃困卧北牕風  
悠然一夢南柯去  
千騎靴刀怕首紅

二

蕨芽載土笋穿叢青子森森褪小紅  
與物無情吾老矣  
如今休恨五更風

三

青梅着子欲生仁始見新紅觸眼新李徑桃蹊俱埽地  
一枝獨自占餘春

四

一種奇葩絕衆芳  
朅來當戶見鉏傷  
猶看紉作幽人佩  
獨步修門擅國香

示天寧晤老

錫號延春閣知名四十年  
向來香一瓣恭為佛陀禪  
霧沐山藏豹風餐葉翳蟬  
寥寥千佛後又見一燈傳

哲宗  
皇帝

晏駕晤老從佛佗禪師問語  
于禁中延春閣錫號祖燈云

二

有地逃銅馬無心待玉魚牛眠今可矣龍耳欲何如荷

錘千岩去連轆十日餘殷勤古松下為剖囊中書

晤老  
為亡

兄卜地號卧牛山而穴  
未定故有龍耳之語

次韻德發驅虎

三窟憎狡兔兩端忌首鼠含糊有前却遺患在養虎操  
刀肯能斷坐見皮寢處應湏下車搏不待探穴取恢恢

天漏網洶洶國破斧驚呼咤萬口走避空一府長圍起  
伏虛尺箠下戛敵迷行出漢圈送死入鄭圖大虺保屍  
領童兒聚儔侶枯顱歸閣束敗鞢實庭旅寧堪裹馬革  
但恐汙牛弩三患古所害一死誰貫汝緣林亡關命首  
禍自呂母師行費千金城壞墮百堵踞鞍髀欲消囊笏  
頰誰拄要先羣鯨戮未快一虎去

讀沈德潤詩卷

繫馬門前柳投鞭息吾駕青林合扶疎木杪抗風榭沈

郎天骨清衆坵立嵩華閉閣卧讀書一榻過僧夏尤工  
五字律句法窺鮑謝無窮真炙輠有味乃食蔗我老復  
何為齒髮日夜化寅緣葦間見拊髀起一咤懸知擲地  
響自欲補天罅坐令長安楮頓起千金價

讀王季恭詩卷小詩為謝

潛泉不到一周星膝上郎君得我驚大府潭潭真老相  
長淮滾滾舊家聲渥洼隨地湏千里窮髮垂天佇一鳴  
莫遣畫蛇安兩足宮袍賜錦待先成

季恭蔡天啟  
舍人之甥也

二

金鐘吼徹曉霜清  
瓦釜如雷不敢鳴  
欲識呼盧真彥道  
試吟石鼎調彌明  
牙籤萬軸撐腸滿  
金檢千篇唾手成  
堪笑韓公太多可  
浪傳侯喜有詩聲

寄題錢申仲漆堂隱居四亭

望雲亭

昔年隱君子去修地下文  
王官竟不返幸樹十里春  
哀哉抱長思慟哭蒼山根  
腸回日萬周繫此三尺墳  
傷心



閱黃壤矯首望白雲雲去無處所淚濕塚前麟

芳美亭

離離陌上花春到錦營中上塚千騎出竟天晚旌紅故  
園已陳迹風流餘此翁渺渺山間曲披披烟雨叢種桃  
今著花千岩貯春風錦繡裹山谷遺民悲故宮

遂初亭

行有叱馭難坐有垂堂畏莫驅九折險輕用千金貴為  
貧聊爾爾興盡我輒逝平生慕朱遊肯汙薛宣吏清曉

挂笏坐西山有佳氣一笑食蛤蜊寧復知許事

通慧亭

磽磽錫為骨瘦脊盤九龍中涵千斛乳連絡萬竅通漆  
堂枕其股關飄迺不供詩翁虧天巧妙契卓錫工青林  
破蒼玉碧井卧白虹他年一杯酒配食桑苧翁

寄題胡茂老樞密橫山堂

古縣水山國萬室蟠其中環成千嶂關並合不泉通我

公擅一壑曾雲生溢胸放神八極外坐駕兩腋風我我

十二環半出簾幕重修眉畫新就一抹翠埽空欣對愜  
平生似為悅已容百金置酒地牕戶浮青紅高陵拄笏  
見採菊籬下逢闕坡逕千丈橫絕垂天雄日麗鶯谷曉  
沙喧燕泥融悠然命中車往往載客從大句琢天巧闕

絃奏三終溪山久寂寥高辭擅無窮天王駕羣英長轡  
係九戎安知橫山下一榻似老龍功名方鼎來龜祥兆  
飛熊勒石誦中興浯臺兩穹崇西州歸謝傳東海表太  
公千年丁令威騎鶴還故宮

次韻向伯恭侍郎致政歸臨江

六龍暴鬣海生塵霖雨方資命世材此去謝公須強起  
誰令陶令賦歸來追懷玉筍三年別指點薌林一笑開  
大舸橫江日千里憑誰倒曳九牛回

湖州道中

望道場山塔

碧玉旋螺插暮烟遙看桂子落僧前試尋白水田頭路  
一葦橫江浪接天

二

蕭寺知名四十年身投籠檻到無緣  
行人指點松間路正在孤雲落照邊

早發下若

宿雨乍收山氣斂清風欲發曙光寒  
紛紛鳥動行人起百尺浮圖水底看

過東山

在臨安縣

千章古木翳山根誰與山僧共寂寥  
珍重庭松寒不死

蒼皮老榦雪齊腰

橫山堂

波間指點見青紅  
雪脊噌嶸倚半空  
幻出生綃三萬幅  
遊人渾在畫圖中

二

蒼雲十畝蔭平寬  
露葉風枝繞舍寒  
莫遣先生賦歸去  
且令小吏報平安

三

溜雨蒼皮四十圍年來又見子孫枝  
龍鍾白首門前客待看成陰合抱時

荆溪道中四言送僧

老蠶上箔倦鳥投林牛閒人卧薺麥交陰孤舟縱棹綠  
漲一尋好風徐來清和滿襟舉盃屬影伴我孤斟老矣  
鍾儀尚操楚音高山流水寓此琴心上人問我何念之  
深

題谷隱

碧瘦我干疊清深漲一篙紅輕花侶肉綠細柳如綵句  
好無強對神超有獨遨葦間青簫笠彷彿見秦逃

二

露濕芙蓉曉風甜橘柚秋衣中紅影亂尊俎翠光流塵  
暗迷三馬陽驕喘萬牛五湖烟雨裏不繫有孤舟

送張牧之赴南昌

青山觸熟並西州沒馬黃塵接地流庾亮南樓應有待  
薛宣東閣可能留官閑端為三升戀興盡還從五斗休



繪出金盤堆白雪秋江一葉認歸舟

四月十五日收之赴南昌辟某與季野從周餞于  
松沛佛舍竟酒步月至垂虹亭久之遂別戲作

數句送之

銀河竟千里水接雲漫漫一杯屬明月俯見人影亂張  
公江海客坐嘯白鷗伴寥寥如清風一笑亦可喚叫朝  
駕戎軒插羽流白汗行矣且勿驅未怪安石緩神光射  
斗南絢若金碧爛出門問何祥銅章付雷煥

臞菴

落日吹行客馬上振短策觸途眉見赤墮俗眼生白安  
知青林中有此江上宅決背破天藏盪胸納空光一奩  
注寒鼎表裏洞八牕風水自吐吞噴雪忽滿江臞翁目  
如電坐閱東海變酒酣跨赤鯉謁帝通明殿霓裳月中  
聞羅襪波上見我老寄漁商家風在瀟湘虛舟自不繫  
倦鳥寧復翔一榻如見容拄杖挂鉢囊

送徑山僧

桑棗翳一邱風雨鳴四壁晨門響丁丁一笑喜折屣臞  
先詩作瘦句有徑山色哀彈發朱弦妙寄追白石虛名  
子過聽愧卧不能夕歸袖挽莫留凌空看飛錫

過慧山見舊題

一別名山十五年宦情羈思兩茫然故人半作累累塚  
只有蒼官立道邊

二

髀骨消磨馬上鞍塵沙滿眼路漫漫不須更障西風扇

為酌崖泉一洗看

王佐司致政還鄉

安眠不踏鼓蓬蓬  
榮路先回鷁退風  
獨岸角巾東路去  
休驚蕙帳北山空  
畫圖便可追三士  
同社誰能作兩翁  
待拄一筇隨薊叟  
摩挲銅狄霸城東

二

水滿滄浪舊釣磯  
春風江上片帆歸  
繁紅不見桃千樹  
老幹空驚柳十圍  
萬壑烟雲供坐嘯  
一龕香火結真依

落花細草應堪藉醉撼長條雪滿衣

過臞菴示王文孺

黃帽青鞋兩鬢斑一簑聊寄此身閒不因誤入桃花去  
那得黃緣見葦間

二

雞犬無聲白日閒一筇九節過眉斑會須俎豆三高士  
且寄風流二老間

華亭朱師實中大燕超堂

海禺納萬艘市區沸百賈黃塵翳白日千騎騰一鼓蚊  
巢十字路四顧盡曠土蝸角兩大國一怒有標杵角名  
眩多廬聚訟攻衆楚昏氣自成霧濯濯汗浹雨朱公誤涉  
世吏隱寄圭組俗緣墮人境心大接天宇寥芳採蓮舟  
擷秀藝藥圃山寒石稜紫樹老松鬣古風牽碧羅卷雨  
壓翠燾舞寧須烏催酤自有花解語觀魚樂洋洋夢蝶  
飛栩栩坐令遊俠窟化作仙佛土高卧水國秋靜憇月  
庭午不解壺公龍天上有官府

洞庭沈氏園亭

雲根瘴滔天萬疊如連環  
我我一鏡中綰結十二鬟  
壇殿歲月古徹石蒼苔斑  
毛公已仙去故物尚人間  
羣胡射漢月獵火爇百蠻  
安知橘中樂避世真商山  
英英東陽孫高情寄人寰  
誅茅擇地勝斬崖破天慳  
開軒疊蒼玉亂峯刻潺湲  
顏循除繞羅帶淺溜鳴潺湲  
意行雲共出地坐草可班  
興至亦乘桴一簑卧滄灣

洞庭善慶堂置酒小詩寄之

幽絕小蓬壺參差見畫圖  
亂青山四出一碧水平鋪  
洲蕊紅相照沙茸細欲無  
蓮房駢百子橘園聚千奴  
布穀休催種提壺且勸酤  
楚腰飛燕燕秦缶扣烏烏  
便旋驚回雪連娟引貫珠  
西風催畫鷁落日詠驪駒  
浩蕩川原隔驚呼歲月徂  
寥寥清夜夢直擬控搏扶

華山德雲堂

昔年曾上德雲堂木奴千樹新著霜  
白首重來十載後六花簷蔔薰  
風香湖上青青只如舊  
湖波漲綠濃於酒



堂中老宿尚依然烏鵲巢肩柳生肘

講堂

誰令堅白鳴自作雪羽爭莫遣蠅鑽楮便恐鼠汙羹道  
師表衆惑自逐鞭影行拊几無一言大千作雪鳴

折玉崖

巉巖兩崖青漫漫一奩白坻沙射月彩牕戶栖珠壁定  
心如止水逝將老空寂手弄一掬寒面徭千仞碧須防  
童子喜往往犯瓦礫

興化朱公大卿沒于庚申歲既除喪矣其子彥寔  
過余于晉陵留十日而別賦二小詩以餞之

百感傷心老淚潛一杯埋玉卧空山着鞭竟看駒千里  
窺管初驚豹一斑貧病故侯今白髮風流公子尚青綸  
不須優孟追諧笑已見遺珠合浦還

二

柴扉忽枉故人車躡履歡迎一笑初夢裏覆蕉疑有鹿  
食前彈鋏歎無魚匆匆注瓦澆村釀草草供盤折野蔬

卷四  
他日死生君一訪上林鴻鴈有書無

讀張彥明飲酒賦詩唱酬次韻

滿酌黃壚萬戶春倒投紫騎八仙人  
句中得曲陶元亮酒裏知名賀季真  
九醞調成花上露一丸燼出鼎中銀  
老來不辨追強對分我餘光幸借隣

青毡堂

晉馬已老矣楚弓今得之懷璧萬里至  
化鶴千歲歸主人有故巢鳩居不復栖  
俄驚桑田換已見城郭非偶尋

蕉中覆忽得爨下遺平生手所種老大今十圍故壁初  
見蝎空尚床支龜塞翁一笑喜共賦青毡詩

別雲閣黎

邂逅不煖席躊躇空復情復隨孤月出又作片雲征已  
振空中錫聊班地上荆他年葛洪井更欲問三生

送僧慧徹

千燈佛祖後五字島阿間危坐肘生柳獨謠肩聳山浮  
盃更東渡振履又西還為我覓釣舟一簑伴子閒

徹自言雲

問人船子道  
場之所在也

右丞相張公達明營別墅于汝川記可遊者九處  
繪而為圖貽書屬晉陵孫某賦之

澹臺書堂

松根絡斷崖石脚注細泉書堂何代育故物尚依然右  
丞今摩詰尚友千載前神交夢仙舟地勝真輞川散策  
塵外躅脫履區中緣盃樽酌花鳥一醉藉草眠

澹岩唐  
人何仙

舟書  
堂也

泊湖潭

藹藹竹樹交一潭  
蔭寒青已無鼃  
鼃汙尚有蛟龍腥  
林踈泛月彩艷艷  
一鏡平我心亦如  
此炯炯珠夜明  
意行魚共樂坐穩  
鷗不驚更欲漱吾  
齒不掛功與名

蝦蟇石

天公磔蛙死墮地  
化為石魁然此江  
郊面帶蒼烟色葱  
龍一拳青凝湛半  
蒿碧猶疑老蟾窟  
尚吐月中液我來  
蹈其背坐睨倚天  
壁鼓吹不復鳴烟  
雨空寂歷

多寶院

穿雲訪幽伴倚枝蒼崖根冥冥篁竹中古寺松為門野  
僧營一飽乞食山下村擁鼻且獨謔未覺釣石溫世事  
風雨過歲陰波浪奔飄然得遠遊寄此五石尊

梅仙潭

潭潭雲幕垂杪樹秋聲發飛仙駕青鸞通籍在金闕遙  
見切雲冠尚想凌波襪殷勤小梅花獨照黃昏月生綃  
濕香霧翠袖卷烟雪忽然東風惡一夜吹石裂

金石臺

層臺接叢霄東西鬱相望地靈鍾神秀人物擅一方相  
居踐台斗爭雄兩魏卽倚薄雲雨近蔽虧星月光陳迹  
恍如接尊名綴前芳獨有真男子平生盛孝章

懷賢庵

佳人去何之歲月忽已逝懷人昔孟光問道今法喜百  
年草頭露一夢月中蜺見此兩足尊感動淚如洗區區  
記刻舟兒嬉亦漫爾永絕三生緣付此一彈指



翠積樓

曾稜倚高寒  
冥兀擅空闊  
江橫碧羅帶  
山斷青玉玦  
湛湛清不搖  
霏霏翠如撥  
松溪奮蒼鬣  
苔石換綠髮  
陰森揉肌粟  
篠絢亂眼纈  
憑欄送落景  
一鳥烟中沒

甘坡莊院

張公卧江海  
戢羽如鵬蹲  
平生廊廟具  
投老三家村  
一壑身所寄  
萬里心自存  
買花紅間坐  
種竹青滿門  
似聞橘生奴  
漸見桐有孫  
提壺時見招  
一笑空蠱尊

題宜興閭邱令巢鳳亭

老仙躡兩鳬自歌于蕙于千岑對隱几萬竹繞直廬上  
有丹鳳穴巢居插脩梧竒毛間五采爛斑此英雛啾啾  
黃雀羣百陋見一姝追風嚇六鵷逐日墜九鳥芝田有  
遺啄握粟未可呼大池九萬里一飛試南圖

二

少年有殊相瓠白非仙懼三吳山水窟見此紫鳳雛家  
無擔石儲腹有萬卷書陳編踐芻狗博具抵牧猪手持

半段槍伎癢始一呼倒海探龍額據地捋虎鬚有客持  
釣樞大書表其閭盛事傳不朽畫入荆溪圖

時宜興方脩圖經

和張正民通守

零落衣冠汙塵土戴盆望天那得覩青黃着爨不下焚  
糟粕空傳紙上語判花視草迹已陳十年閉口不論文  
君詩藹藹春雲侶來弔湘江九死魂

張全真大資四老堂

真人東方行攜紉坐小輦五星聚光炯八龍卧偃蹇張

公世忠孝七葉冠蟬聯翹翹麟一角濯濯蕙九畹聲名  
大小馮門巷南北阮墳麓自鳴和滿耳聽睨睨春粟悲  
漢謠然其笑魏編詎聞華亭鶴空憶上蔡犬堂堂鼎軸  
老東道迪天顯寧拔千金璧不踐九折坂飛飛鴻鴈行  
戀戀桑榆暖草木香山春烟波洞庭晚芝老正可茹橘  
熟行可寧連床話團圞共此一笑莞當年伯仲氏衫鬢  
綠婉婉彩衣戲翁側玉立盡瑚璉崢嶸六門闕突兀今  
在眼歲月知幾何華皓森雪燮扶顛屬匠石起死待和

扁富貴挽不來拄頰但手版談間鋸屑霏酒伴金荷卷  
舞茵翔兩鸞歌板曳猶繭冰壺明月吐琪樹清風滿起  
尋赤松遊仙籍標閭苑

少逸登第還里中喜而賦詩少逸過余出示和篇

次韻為賀

帳底諸生擁鼻謠詩書滿腹侶邊韶禹門擊水高三級  
堯殿披雲煥九霄駿馬看花春寂寂長檠燒燭夜寥寥  
一飛更上金鑾去滿袖香烟散早朝

三衢教授陳德召寵新篇無辱寄惠古史賦三小  
詩為謝

伐樹已埽迹種桃今問津一筇隨卧起四壁空無鄰有  
懷平生遊老手妙斲輪去寥柯山秀盡作泮水芹栽詩  
問無恙寄此嶺頭雲

二

世人識真少耳剽得驚坐安知百尺樓上有元龍卧儒  
官為官曹學子書吏課長謠振商音麗藻發楚些獨有

白雪章妙絕無人和

三

太史命世豪始作表傳記著書自一家亦足見奇偉寥寥向千載筆削號古史排斥已甚哉不學而見詆孰云爭名者區區在朝市

題靈岩五至堂

老人肯記觀何處白髮蒼顏只如故湛然不與生滅期始信真心有常住公今忘物無忘我坎止留行無不可

桑下了無三宿戀壁間一坐九年過振錫忽逐秋鴻往  
浮盃又趁春潮上一片孤雲自在飛不落人中去來想

鄭惇老兼老寄示畫賦小詩為謝

三椽容膝地一枕曲肱眠手把故人畫起行夢相牽明  
河天上落一派墮我前溶溶注銀海浩浩寫玉川老眼  
眩欲迷今在第幾天堂堂通德門種德今百年齋房九  
莖芝岳井十丈蓮連枝挺奇秀見此兩謫仙詩成掣珠  
玉紙落生雲烟一飛省昂霄雲中雁行連



章席祖巢雲閣

翳翳林影交小閣俯江郊千崖障錦綉萬壑鳴弦匏脩  
然一枝筇寄此三重茅久知風御叟取雲可為巢抱石  
舒翠縷綉色纔可睹霏霏擘春絮歛見白鶴舞凝眸一  
瞬間忽展垂天羽起從潭中龍去作山下雨

題李營邱畫

酒膽乘酣思如湧戲括枯筆為此弄誰令堂上生楓樹  
自是胸中有雲夢前山厯厯桀可數淺瀨鱗鱗森欲動

一嘯參差是故林  
歸心已逐孤雲縱

寄題莫謙仲

山居

魚鹽市井雷冠蓋  
車馬路生息自相吹  
晨門默如霧超然  
塵外躅肆兀見砥柱  
湯湯海橫流自有安  
立處幻泡水上漚  
空華草頭露一峯獨  
蒼然歲寒但如故  
醉褰庭下花吟繞池  
邊樹便有山中臞來  
隨白雲屨

西樓

層梯倚半空百尺卧元龍偃蹇一榻上崢嶸兩爭雄暮  
捲珠簾雨夜鎮犀帷風吾公安在哉雲間指青紅俯視  
大千界一器蚋滿中巢蚊幸有餘國蝸遂相攻湛湛天  
一碧萬里磨青銅不落牛背上悠哉送遠鴻

過慧山方丈皞老酌泉試茶兩詩遺之

蕭蕭呵蘭若桑苧有故家佛屋倚高寒僧蹊抱歌斜殷  
勤泉上客流落瘴海涯蜃酒壓梨楂蠻烹嚼鼉蛇光潔  
鏡一奩照影空自嗟老僧薦茗粥芳鮮凝露華驅除臭

中雷埽盡眼界花飄飄思凌雲攝身上蒼霞

二

戰塵霾漢天獵火炊邊地一筇遁垢氣步入青蓮寺耽  
耽九龍盤一壑埋老翠倚天松骨大粘壁苔髮細道人  
本臞儒得法妙出世胸中萬斛泉洗盡蔬筍氣天風吹  
泠泠助我鳴鼓吹名為不二門聲音作佛事

過楓橋寺示遷老

白首重來一夢中青山不改舊時容烏啼月落橋邊寺

歌枕猶聞半夜鐘

二

三年瘴海卧炎霄夢隔青楓一水遥  
萬里歸來悲故物銅駝埋沒草齊腰

三

翠木蒼藤一兩家門依古柳抱溪斜  
古城流水參差是不見玄都舊日花

題虎邱劍池

獅子斷斷老更狂潭空百尺卧干將但令雷煥占牛斗  
不用朱雲請上方

二


神兵一躍去千年石底乖龍抱寶眠尚有玉州懷寸鐵  
裁詩救月淚潺湲

吳門道中

數間茅屋水邊村楊柳依依綠映門渡口喚船人獨立  
一簑烟雨濕黃昏

二

一點炊烟竹裏村人家深閉雨中門數聲好鳥不知處  
千丈藤蘿古木昏



鴻慶居士集卷四